

摘藻堂四庫全書薈要

集部

欽定四庫全書蒼要卷一萬九千九百三十五

集部

宋文鑑卷十二

宋 呂祖謙 編

詩 四言

皇雅十首

尹洙

天監受命也自梁至于周兵難不息宋受命統一萬方
焉

天監下民亂靡有定甚武且仁祚厥真聖仁實懷徠武
以執競匪虔匪劉拯我大命自昔外禪月經日營令以

挾制政以陰傾帝初治兵志勤于征奄受神器匪謀而
成淮潞弗虔卒汙叛迹戎輅戒嚴皇威有赫彼寇誑民
吾勇其百殄厥渠魁貸其反側帝朝法宮左右宗公忝
夫悍士以雍以容爾居爾室爾工爾農既息既養惟天
子功

天監四章章八句

西師征蜀也

主用西師岷梁弗賓匪曰負固實交晉人予訓予誓合

我將臣正厥有罪無庸傷民矯矯虎士載摧其壁于嗟
孟侯亦果其策迎師而降靡抗鋒鏑豈獨身謀完是宗
國蜀都既平將臣失律此衆悍驕彼民危慄當塗叫呶
合萬為一匪懷則威帝心是恤帝曰將臣予嘉乃庸廢
命毒民爾弗有終邦典用疑惟罪惟功靡殛而削協于
厥中帝曰孟侯受封于楚淑旂琱戈備物異數俾爾族
姻及乃文武服在王庭靡不有序蜀民呼歌天子威靈
保我者封暴我者刑匪功是和匪弱是陵天子惠民疇

敢不承

西師六章章八句

耆武受俘也命將伐南海平金陵俘二王以獻

耆武定功時惟二方淮服其義海南遂荒孰孱而韞孰
暴而猖自底不諛乃終滅亡帝戒二俘同即爾誅予惟
民無辜休息是圖時其輯矣寧威獨夫帝嗟海邦久罹
于兵或暴下以征或敷虐以刑予命中典協于國經民
服德音室家以寧

耆武三章二章八句一章六句

憲古令守臣也削其附庸以強帝室焉

帝懷永圖治古是憲四方守臣惟屏惟翰在昔艱難弗
惠訓典跨都連城高牙以建有土有民肆乃征繕以息
以容終焉叛渙凡今帥臣徂厥聞見匪革亂原曷清
多難帝告庶邦式是典彝元戾顯父戚臣宗支正乃封
圻予一人是毗凡曰附城罔爾俾之畜兵厚賦靡爾得
私毋凶而國作福作威天子有命疇敢不祇子孫承承

唯萬世規

憲古二章章十六句

大鹵王師討晉罪也

冀州之疆粵惟大鹵俗忤而專地扼而固協比幽都蕩
搖邊圉三垂既夷允威弗沮帝御六師百萬貔虎剪其
附庸至於城下鋒鏑始交梯衝如舞蠢爾孱王請附降
虜我士奮揚願究吾武皇帝曰吁念彼黎庶匪鯨匪鯢
復為王土晉郊既平九區以寧陳功太廟告假威靈在

昔武王于商觀兵惟我藝祖亦勤于征匪貸晉罪俟厥
貫盈聖作聖繼巍巍相承皇矣二后功莫與京

大鹵二章一章二十二句一章十四句

帝籍修故典也躬耕以勸農焉

帝籍于郊典儀具陳務農以訓供祀以勤祀在于誠匪
勤于人訓農以實匪訓以文帝謹二物乃躬乃親公侯
卿士暨厥庶民千甸有制飭哉惟寅帝賚高年式宴且
喜種種黃髮族立而議我生艱難暴亂以繼耳徧金鼓

目狎戎器皇其我圖親講農事有子有孫力田孝悌鼓
舞至仁薰焉如醉

帝籍二章章十四句

庶工任賢也

帝咨庶工疇其輔予俊乂以登厥勞乃圖匪忘舊勲非
賢勿俞巍巍衮台盛德以居任賢伊何昌言是庸勉告
爾猷罔恤廼躬豈無猥辭悌于予衷予不爾疵爾無面
從始時從官戎容揚揚今帝左右儒冠煌煌朝廷以尊

文物典章得人之盛奕世重光

庶工三章章八句

帝制北方請盟也

帝制萬邦罔有弗賓蠻夷戎狄羈而勿臣威格三方稽
顙獻珍單于草心願交使人帝謀公卿列侯庶校咸曰
彼心暴戾陰狡既擾我疆復利吾寶無若勵兵襲其還
道皇曰有衆予實念茲戰無必勝矧其歸師借曰大獲
疇能盡之益俾餘醜毒吾朔陞乃俞其盟北州以綏在

漢世宗抗威北戎暴農筭商經用弗克中土震騷漠南
始空降及後世猶稱厥功於穆聖考德無與偕匪勤于
兵北人遂來逮是三紀遠俗以懷生民休息嗚呼仁
哉

帝制五章四章八句一章十句

皇治恤刑也帝仁于明刑在位者以寬恤為治焉

皇底其治欽哉惟刑在疑而宥罔察為明愛怒弗肆孰
為重輕毋一弗辜惟典之平前世理官倚法以刻匪彼

為仇蓋曰任職令之蔽獄務正其辟鑒于前人繫我仁
德皇德在仁寢而成風公侯卿士靡不率從麋卯萌生
咸保厥終不鄙不天樂哉融融

皇治三章章八句

太平封祀告成功也

噫太平無象兮世烏得而知維盛德可迹兮其封祀之
儀東岱宗兮西汾睢禮上帝兮賓地祇皇有征兮吾民
以嬉皇有祈兮吾民是私天數佑兮俾皇之釐永世億

寧兮無疆之基

太平一章章八句

定州閱古堂

富弼

天下十八道惟河北最重河北三十六州軍就其中又
析大名府定州真定府高陽關為四路惟定州最要定
為一路治所實天下要重之最知是州者兼本路兵馬
都部署居則治民出則治兵非夫文武才全望傾于時
者不能安疆場屏王室也然自國初已來專以武臣帥

諸路慶歷七年甘陵妖賊據城叛河北妖黨相搖以謀
應卒驕將悞人心大震天子悟始議選儒臣帥四路以
督諸將廼起知鄆州資政殿學士給事中昌黎韓公帥
真定以遏亂萌明年春賊誅人安既而夏大雨河決商
胡東北入于海河北災人復不寧流徙失業者四出咸
不翅千里僵殍滿道天子恤然且虞他姦遂以公帥定
定既要重天下宿兵素多屬傷殘之後官民枵困征賦
逃無幾而兵不少減兵襲舊幸歎益驕以悍公夙夜裁

整以威以懷兵之驕不從令者捽其首惡斬以徇略為
條教餘怙怙就約不敢譁于室至有調發者遠而彌戢
如公親臨已而招集逋亡四流爭還如啼孩奔父母惟
恐其後至則克然各得其欲農無廢隴賦有餘粒不旁
誅橫斂而上下足堙漏補罅一面完固公既擊彊梗之
兵又育彫瘵之民左行斧鉞右哺飲食亂者畢治亡者
畢存禮法政教向之人所不得聞者今漸濡酣飫無不
貫徹自是邊人草其耳目新其肝腸優為而樂從故人

易治而功成速也又明年秋天子圖公之功詔加大學士公先嘗表其志幸終三年不願亟易也至天子抑騎召而使即以授姑遂公請亦以慰斯人愛公之心也公惕寵處官雖無事未嘗輒自豫念兵與民之急宜無過者矧臨要重之路憂虞所繫凡是計畫不可以無法廼擇取歷代賢守良將總若干人行事創大屋以類相次繪于周壁榜之曰閱古堂蓋欲閱古之人所為而為之法也噫公雅文傑武自當視乎古人且天下方遲公入

輔以致太平若其安疆場屏王室豈庸考古而後能哉
實公冲然不自有其有而歸乎古人也其懸知來者不
師繪事而公是師也雖然蹋古蒐善惠人警已公之意
謂其至矣乎公郵問索詩因粗序所致之旨以誌其始
而示于後詩曰

朔方之兵勁于九土尤勁而要粵惟定武兵勁在馭用
則羆虎失馭而勁驕不可舉曰保曰貝閉壁連阻武爵
斯守束手就虜皇帝曰噫汝武曷取有敝必革以儒于

撫公來師定始以威怒有兵悍橫一用于斧連營怛之
膽栗腰偃既懼而教如哺如乳以刺以射以鉦以鼓無
一不若師師旅旅列城自制靡不和附陰沴為梗降此
大雨大河破洩在河之許民被黜墊田入污莽流離蕩
析不得其所公感曰吁予敢寧處迺大招來乃大保聚
乃營帛粟寒衣饑茹民歸而安水下孰禦彊弱死生由
公復慮曰義曰仁震肅春煦合和蒸天天順以序公境
獨稔爰麥爰黍公俗獨樂夫耕婦杼人雖曰康公亦奚

豫謂此一方民與兵具務劇任重稽古人裕人皆謂公與古為伍公文化民公武禦侮何思古人公不自許遂擇奇將繪于堂宇列其行事指掌可數前有古人在我門戶後有來者依我墻堵斯堂勿壞有堂有故堂之存來者曷覩宏乎煥乎千載是矩

裕禮頌聖德

梅堯臣

溥哉孝享將事于寧文武卿士冠劔在庭
溪俟帝齋風霰其零風霰不已鉤陳豹尾龍旂太常立列比比帝居

路寢百辟就次至于穀旦漫漫翳翳帝入靈宮左撞黃
鍾陞階置玉日氣曛隴鴻鴻杲杲氛駁陰掃宿于太宮
月星皓皓侍祠之臣鵠舉鷺振或捧其匱或進其中輔
相夾道俯僂鱗鱗主瓚以陳登歌以均東向虛位發爵
親親平明帝還紫宸序班望帝之顏穆穆閑閑簷步迴
廊雪浮陽光大楹爛爛朱陛煌煌稱祝萬壽萬壽無疆
却登寶輿以御端門揭鷄肆赦雷動乾坤于時都人于
時婦女于時蠻夷異口同語天子萬年仁聖之主臣時

執策與物咸覩敢播于詩庶聞九土

魏京

劉敞

上二十年治建北京以章明先帝巡狩之德以孝思于
下于時野之處士或相與議曰蓋文王都豐武王都鎬
豐鎬之間不能數百里文武之位不過侯伯而詩人乃
以聖人之德天子之事歌之有如聖朝德位相侔述作
相繼而無逼駿烝哉之詩此乃處士之罪非公卿之過
也乃考聲譌辭以繼大雅垂之無窮其文曰

皇作大都大都雄雄奄定北國四方來同皇曰卿士在
昔聖考祇邁文武維慈幼老天監在上既有明德乃命
于下罔有不復匪允命之亦章慶之匪允服之亦保育
之時維玃狁侮予之疆靡度靡虞跳呼以狂業業烝黎
載震載驚侵魏及澶群心不寧帝奮厥武百萬其士匪
怒以棘于三十里如虎如貔如霆如雷靡有遠邇天子
其來天子來止士增其喜孰偷其生以不奮興驅之渾
渾攘之賁賁靡有輟張殲厥鯨鯢或獻其寶或請其命

帝振于旅維時既定屹屹魏土山河之固匪山河則固
維上帝佑既閔爾弓既橐爾矛獫狁臣之四方是休皇
曰卿士聖孝之德允于孝思孝思維則爾眎于魏以作
我都以赫厥靈俾後勿踰皇曰卿士維帝時功時亦維
人維寇萊公爾敬爾止弼予于治期爾前人用迪爾事
皇曰卿士維帝作武垂是萬年莫敢予侮泰山之封后
土之禪予監若茲維天是眷翼翼魏土天子國之穆穆
原廟聖人則之孰為彊暴來覲來覲俾驚于威于忠是

訓顯顯天子孝德自躬率是休烈覃之北戎河水東注
昭哉禹績時萬斯年天子之德

古風

劉敞

子欲富矣何用為富農不若工工不若賈子欲貴矣何
用為貴德不若名名不若勢粹兮純兮三五之人兮終
窶且貧兮孰知其珍兮

閔雨

劉敞

臣伏見春首以來天久不雨厯官李用晦治大衍軌革

太醫趙從古治黃帝六氣咸以謂風旱歲惡然陛下焦
心勞意側躬修德蕃樂損膳議獄宥過以迎導善氣爰
及言事得罪者唐介杜樞之徒復特見甄序小大之臣
莫不欣然人情悅則天氣和矣乃三月己巳日入而雨
至於庚午詩不云乎益之以霡霂既優既渥既霑既足
生我百穀以此見聖人之德與天相符言出而物應行
發而神助雖水旱之占有常數者猶不能違之況其眇
者乎竊觀詩書所載盛德之君至誠動天之速未有及

陛下者也臣不勝鼓舞之至謹撰閔雨詩一首十三章
章六句投進以聞

堪輿網緼一晦一明或沉而毀或亢而暘自古以然世
習為常民生冥冥靡究靡知其幸而吉不幸而災猖狂
妄行唯所遇之天命降監在我元聖兼覆慶裕四方既
定維民之恤無所疵病伊年暮春旱久不雨人曰時哉
歷有常數禹湯之賢莫能弗遇帝獨喟息是豈足言化
育萬物若鎔以埏患在誠薄不能動天退而齋心淵默

以居鐘鼓不抃宴游不娛左右肅然一懷瞿瞿疏獄省
刑與物更始內恕孔悲引咎在已爰及四海愚智咸喜
追悟讜直褒進淹滯聲色無迂式序在位嬖習權近懾
威屏氣已已乃雨若有鬼神淒淒其風淦淦其雲自東
徂西罄無不均匪震匪拔匪溢匪洩生我百穀區萌畢
達以亭以食小大胥悅天子之德視雨之施肇自京師
達于四裔無有蠻貊孚我君惠天子之政視雨之時養
老長幼速哉熙熙更化易俗而民不知天子之慶視雨

之積自天降康時萬時億眉壽無疆以靖四國

新田

王安石

唐治四縣田之入於草莽者十九民如寄客雖簡其賦
緩其徭而不可以必留尚書比部郎中趙君尚寬之來
問弊於民而知其故乃使推官張君恂以兵士興大渠
之廢者一大陂之廢者四諸小渠陂教民自為者數十
一年流民作而相告以歸二年而淮之南湖之北操囊
耜以率其妻子者其來如雨三年而唐之土不可賤取

昔之菽粟者多化而為稊環唐皆水矣唐獨得歲焉船
漕車輓負擔出于四境一日之間不可為數而唐之私
廩固有餘循吏之無稱於世久矣予聞趙君如此故為
作詩詩曰

離離新田其下流水孰知其初灌莽千里其南背江其
北逾淮父抱子扶十百其來其來僕僕鋤我新屋趙侯
勛之作者不饑歲仍大熟飽及鷄鶩僦船與車四鄙出
穀今游者處昔止者流維昔收我不如今侯侯來適野

不有觀者稅于水濱問我鰥寡侯其歸矣三歲于茲誰能止侯我往求之

潭州新學

王安石

治平元年天章閣待制興國吳公治潭州之明年正月
改築廟學于城東南越五月告成孔子用幣潭人曰公
為善政以德我又不勸我而為此學以嘉我士子誰能
詩乎以誦我公於無窮皆辭不敢乃使來請詩曰

有嘉新學潭守所作守者誰歟仲庶氏吳振養矜寡衣

之褰襦黔首鼓歌吏靜不呼乃相廟序生師所廬上漏
旁穿燥濕不除曰嘻遷哉迫阨卑污當其壞時適可以
謀營地慮工伐梗楠櫛徹故就新為此渠渠潭人來止
相語而喜我知視成無豫經始公升在堂從者如水公
曰誨汝潭之士子古之讀書凡以為已躬行孝悌由義
而仕神聽汝助況於閭里無實而夸非聖自是雖大得
意吾猶汝恥士下其手公言無尤請詩我歌以遠公休

明堂樂章二首

王安石

皇帝還大次憩安之曲

有奕明堂萬方時會宗予聖考作帝之配樂酌虞典禮
從周制釐事既成於皇來暨

歆安之曲

穆穆在堂肅肅在庭於顯辟公來相思成神既歆止有
聞惟馨錫我休嘉燕及群生

顏樂亭

為孔周翰作

程顥

天之生民是為

一作惟

物則非學非師孰覺孰識聖賢之

分古難其明有孔之遇有顏之

一作其

生聖以道化賢以

學生

一作行

萬世心目破昏為醒周爰闕里惟顏舊止巷

汙以榛井堙而圯鄉閭蚩蚩弗視弗履有卓其誰師門
之嗣追古念今有惻其心良價善諭發帑出金巷治以
闢井渌而深清泉澤物佳木成陰載基載落亭曰顏樂
昔人有心予忖予度千載之上顏惟一作為孔學百世之
下顏居孔作盛德彌光風流日長道之無疆古今所常
水不忍廢地不忍荒嗚呼正學其何可忘

何公橋

蘇軾

天壤之間水居其多人之往來如鵜在河順水而行雲
駛鳥疾維水之利千里咫尺亂流而涉過膝則止維水
之害咫尺千里汚彼濫觴蛙跳儵游溢而懷山神禹所
憂豈無一木支此大壞舞于盤渦水拆雷解坐使此邦
畫為兩州鷄犬相聞胡越莫救允毅何公甚勇于仁始
作石梁其艱其勤將作復止更此百難公心如鐵非石
則堅公以身先民以悅使老壯負石如負其子疏為玉

虹隱為金堤直欄橫檻百賈所栖我來與公同載而出
謹呼填道抱其馬足我歎而言視此滔滔未見剛者孰
為此橋願公千歲與橋壽考持節復來以慰父老如朱
仲卿食于桐鄉我作銘詩子孫不忘

觀棋

蘇軾

予素不解碁嘗獨遊廬山白鶴觀觀中人皆闔戶晝寢
獨聞碁聲於古松流水之間意欣然喜之自爾欲學然
終不解也兒子過乃粗能者儋守張中日從之戲予亦

偶坐竟日不以為厭也

五老峰前白鶴遺址長松蔭庭風日清美我時獨游不
逢一士誰與慕者戶外屨二不聞人聲時聞落子紋枰
坐對誰究此味空鈎意釣豈在魴鯉小兒近道剝啄信
指勝固欣然敗亦可喜優哉游哉聊以卒歲

和陶淵明時運

蘇軾

丁丑二月十四日白鶴峰新居成自嘉祐寺遷入詠淵
明時運詩云斯晨斯夕言息其廬似為余發也乃次其韻長

子邁與予別三年矣挈携諸孫萬里遠至老朽憂患之餘不能無欣然

我卜我居居非一朝龜不吾欺屆此江郊廢井已塞喬木干霄昔人伊何誰其裔苗下有碧潭可飲可濯江山千里供我遐矚木固無脛瓦豈有足陶匠自至嘯歌相樂我視此邦如洙如沂邦人勸我老矣安歸自我幽獨倚門或揮豈無親友雲散莫追旦朝丁丁誰欵我廬子孫遠至笑語紛如剪髮垂髻覆此瓠壺三年一夢乃復

見余

和陶淵明勸農

蘇軾

予以紹聖元年十月到惠州四年五月再貶瓊州別駕
傲睨之餘慨然有感黎蠻風俗之異乃和陶淵明勸農
詩以告其有知者

咨爾漢黎均是一民鄙夷不訓夫豈其真怨忿劫質尋
戈相因欺謾莫訴曲自我人天旤爾土不麥不稷民無
用物怪珎是植播厥薰木腐餘是穡貪夫污吏鷹摯狼

食豈無良田膾膾平陸獸蹤交蹄鳥喙諧穆驚磨朝射
猛狶夜逐芋羹諸廩以飽耆宿聽我苦言其福永久利
爾鉏耜好爾隣偶斬艾蓬藿南東其畝父兄搢梃以扶
游手天不假易亦不汝匱春無遺勤秋有後冀雲舉雨
決婦姑畢至我良孝愛袒跣何愧逸諺戲侮博奕頑鄙
投之生黎俾勿冠履霜降稻實千箱一軌大作爾社一
醉醇美

江郊

蘇軾

惠州歸善縣治之北數百步抵江少西有盤石小潭可
以垂釣作江郊詩云

江郊葱曠雲水蒨絢碕岸斗入洄潭輪轉先生悅之布
席間燕初日下照潛鱗俯見意釣忘魚樂此竿綫優哉
悠哉玩物之變

洄酌亭


蘇軾

瓊山郡東衆泉觥發然皆列而不食丁丑歲六月軾南
遷過瓊始得雙泉之甘於城之東北隅以告其人自是

汲者常滿泉相去咫尺而異味庚辰歲六月十七日遷
于合浦復過之太守承議郎陸公求泉上之亭名與詩
名之曰洞酌其詩曰

酌彼兩泉挹彼注茲一餅之中有渥有溜以淪以烹衆
喊莫齊自江徂海浩然無私豈弟君子江海是儀既味
我泉亦濟我詩

宋文鑑卷十二



總校官庶吉士

臣

張能照

校對官中書

臣

胡紹基

臚錄監生

臣

陳振德

臚錄監生

臣

邱繹曾

欽定四庫全書薈要

集部

宋文鑑卷十三

四

詳校官候選知縣臣吳甸華



欽定四庫全書薈要卷一萬九千九百三十六集部

宋文鑑卷十三

宋 呂祖謙 編

詩 樂府歌行

桃花犬歌呈修史錢侍郎

李 至

宮中有犬桃花名絳繒圍頸懸金鈴先皇為愛馴且異
指顧之間知上意珠簾未卷扇未開桃花搖尾長先至
夜靜不離香砌眠朝饑祇傍御牀餽彩雲路熟不勞牽
瑶草風微有時吠無何軒后鑄鼎成忽遺弓劍棄寰瀛

迢迢松闕伊川上遠逐龍輜十數程兩皆連連似垂淚
骨見毛寒頓憔悴萬人見者倍傷心微物感恩猶若是
韓盧備獵何足嘉西旅充庭豈為瑞聞君奉詔修實
錄一字為褒應不曲白魚赤鴈且勿書願君書此懲
浮俗

江南春

寇準

波渺渺柳依依孤村芳草遠斜日杏花飛江南春盡離
腸斷蘋滿汀洲人未歸

西遊曲

錢易

花銷秋老白日短敗紅荒綠迷空館擬將清血洒昭陵
幽谷蛇啼半山晚十年辭家勤獻書王孫不許延公車
江頭祖廟祭無血重門生草寒離離我有黃金三尺劍
姦骨餘痕古波艷佩入函關無故人玉握凋零七星暗

伐棘篇

路振

伐棘何所山之巔秋風騷騷棘子丹折根破柢堅且頑
斲夫超超汗污顏攢鋒束芒趨道還稭之森森繚長藩

暮冬號風雪暗天漏寒不鳴守犬眠主人堂上多金錢
東陵暴客來窺垣舉手觸鋒身隕顛千矛萬戟爭後先
襟袖結裂不可揜蹠破指傷流血殷神離氣沮走蹢躅
數尺之墻弗復攀索頭醜奴搔河孺朔方屯師連七年
水波馬領沙填填氣脉不絕如喉咽官軍虎怒思吼軒
強弩一發山河穿將不叶謀空即安翫養小醜成兇頑
推芻挽粟徒喧喧邊臣無心靜國艱為余諷此伐棘篇

吳中曉寒曲

王琪

大澤穹天莽同色碧瓦閭門曉花白石岩左右斷行人
洞庭一夜冰千尺曾持漢節單于壘北風如刀割人耳
知憐凍足幸雙摧一生不向胡廷履憑誰贈我紫綺裘
中吳風土清且柔令嚴氣正天地肅長歌白苧臨寒流
玉蘭酒熟金醅溢大白連雲尚殊克書牕半掩晝始開
幾日紅梅斷消息

清輝殿觀唐明皇山水石字歌

王琪

皇家四葉恢聖功天臨日燭清華戎漢條靜治洽柔教

老心稽古開神聰有唐英主稱好文仙毫灑落驅風雲
壯哉山水有奇字煥乎八法存翠珉自從棄置咸陽道
蘚駁煙滋委宮草天開神贊會休辰甄收再作皇居寶
如何淪廢三百春迎逢睿鑒來紫宸奎鈎粲粲光華動
群玉森森氣象新丹籞春妍瑞靄深文梁藻棟結芳林
鴻翔鳳翥徑方丈杯流泉湧蒙親臨鯁臣榮幸從金輿
鈎婉魂驚拭目初多慙攬筆非清藻唯慶千齡際帝圖

鵲鵲詞

效王建作

歐陽修

龍樓鳳閣鬱崢嶸深宮不聞更漏聲紅紗蠟燭愁夜短
綠窓鴉鵂催天明一聲兩聲人漸起金井轆轤聞汲水
三聲四聲促嚴粧紅靴玉帶奉君王萬年枝軟風露濕
上下枝聞一作聲轉急南衙促仗三衛列九門放鑰千
官入重城禁籞鎖池臺此鳥飛從何處來君不見潁河
東岸村陂闊山禽野鳥常嘲啗田家惟聽夏鷄聲鴨鷄
村人謂之夏鷄夜夜墮頭耕曉月可憐此樂獨吾知眷戀君恩
今白髮

明妃曲

歐陽脩

漢宮有佳人天子初未識一朝隨漢使遠嫁單于國絕
色天下無一失難再得雖能殺畫工於事竟何益耳目
所及尚如此萬里安能制夷狄漢計誠已拙女色難自
誇明妃去時淚灑向枝上花狂風日暮起飄泊落誰家
紅顏勝人多薄命莫怨春風當自嗟

廬山高贈同年劉中允歸南康

歐陽脩

廬山高哉幾千仞兮根盤幾百里巍然屹立乎長江長

江西來走其下是為揚瀾左蠡兮洪濤巨浪日夕相春
撞雲消風止水鏡靜泊舟登岸而遠望兮上摩青蒼以
掩靄下壓后土之鴻龐試往造乎其間兮攀緣石磴窺
空磴千巖萬壑響松檜懸崖巨石飛流淙水聲聒聒亂人
語六月飛雪灑石矸仙翁釋子亦往往而逢兮吾嘗惡
其學幻而言詭但見丹崖翠壁遠近映樓閣晨鐘暮鼓
杳靄羅幡幢幽花野草不知其名兮風吹露濕香澗谷
時有白鶴飛來雙幽尋遠去不可極便欲絕世遺紛疇

羨君買田築室老其下
插秧盈疇兮釀酒盈缸
欲令浮嵐暖翠千萬狀
坐臥常對乎軒窓
君懷磊砢有至寶
世俗不辨珉與玳
策名為吏二十載
青衫白首困一邦
寵榮聲利不可以苟
屈兮自非青雲白石
有深趣其氣兀
砭何由降
丈夫壯節似君少
嗟我欲說安得巨筆如長
杠

紫石屏歌寄蘇子美

歐陽修

月從海底來
行上天東南
正當天中時
下照千尺潭
潭

心無風月不動倒影射入紫石巖月光水潔石瑩淨感
此陰魄來中潛自從月入此石中天有兩曜分為三清
光萬古不磨滅天地至寶難藏緘天公呼雷公夜持巨
斧隳巖巖墮此一片落千仞皎然寒鏡在玉奩蝦蟆白
兔走天上空留桂影猶氍毹景山得之惜不得贈我意
比千金兼自云每到月滿時石在暗室光出簷大哉天
地間萬怪難悉談嗟予不度量每事思窮探欲將兩耳
目所及而與造化爭毫纖煌煌三辰行日月尤尊嚴若

令下與物為比

去聲

擾擾萬類將誰瞻不然此石竟何物

有口欲說嗟如鉗吾竒蘇子胸羅列萬象中包含不惟
胸寬膽亦大屢出言語驚愚凡自吾得此石未見蘇子
心懷慙不經老匠先指決有手誰敢施鐫鑿呼工畫石
持寄似幸子留意其無謙

山鳥

梅堯臣

婆餅焦兒不食爾父向何之爾母山頭化為石山頭化
石可奈何遂作微禽啼不息

送撫州通判袁世弼寺丞

梅堯臣

帆疏疏纖綠蒲二十四幅輕江湖高秋逆水上天去朝
過瓜步暮濡須長風沙頭問鯉魚大孤山側鳴寒鳥魚
腹無書報家信憑烏為到西山區西山松柏應更好及
取之官來拜掃

永叔月石硯屏歌

蘇舜欽

日月行上天下照萬物根向之生榮背則死故為萬物
生死門東西兩交征晝夜不暫停胡為號山石留此皎

月痕常存桂樹散踈陰有若圖畫成永叔得之不能曉
作歌使我窮其源且疑月入此石中分此兩曜三處明

或云蟾

一作兔

蜍好溪山逃遁出月不可關浮波穴石恣

所樂常娥孤坐初不覺玉杵夜無聲無物來搗藥常娥
驚推輪下天自尋捉遶地掀江踏山岳二物驚奔不復
見留此玉輪之迹在青壁風雨不可剝此說亦詭異予
知未精確物有無情自相感不間幽微與高邈老蚌吸
月月降胎水犀望星星入角彤霞爍石變靈砂白虹貫

巖生美璞此乃西山石久為月照著歲久光不滅遂有
團團月寒輝籠籠出輕霧坐對不復嗟殘缺蝦蟇從汝
惡宵吻可能食此清光沒玉川子若在見必喜不徹此
雖隱石中時有靈光發土怪山鬼不敢近照之僵仆肝腦
裂有如君上明下燭萬類無遁形光艷百世無虧盈

荒田行

劉 敞

大農棄田避征役小農挈家就兵籍良田茫茫少耕者
秋來雨止生荆棘縣官募兵有著令募兵如率官有慶

從今無復官勸農還逐魚鹽作亡命

桃源行

王安石

望夷宮中鹿為馬秦人半死長城下避世不獨商山翁
亦有桃源種桃者此來種桃經幾春採花食實枝為薪
兒孫生長與世隔雖有父子無君臣漁郎漾舟迷遠近
花間相見驚相問世上那知古有秦山中豈料今為晉
聞道長安吹戰塵春風回首一霑巾重華一去寧復得
天下紛紛經幾秦

食黍行

王安石

周公兄弟相殺戮李斯父子夷三族富貴常多患禍嬰
貧賤亦復難為情自隨衣食南與北至親安能常在側
謂言黍熟同一炊歛見隴上黃離離遊人中道忽不返
從此食黍還心悲

杜甫畫像

王安石

吾觀少陵詩謂與元氣侔力能排天幹九地壯顏毅色
不可求浩蕩八極中生物豈不稠醜妍巨細千萬殊竟

莫見以何雕鏤惜哉命之窮顛倒不見收青衫老更斥
餓走半九州瘦妻僵前子仆後攘攘盜賊森戈矛吟哦
當此時不廢朝廷憂常願天子聖大臣各伊周寧令吾
廬獨破受凍死不忍四海赤子寒飈飈傷屯悼屈止一
身嗟時之人我所羞所以見公像再拜涕泗流推公之
心古亦少願起公死從之游

題燈

陳烈

富家一椀燈太倉一粒粟貧家一椀燈父子相聚哭風

流太守知不知惟恨笙歌無妙曲

鞠歌行

張載

鞠歌胡然兮邈余樂之不猶宵耿耿其尚寐日孜孜焉
繼予乎厥修并行惻兮王收曰曷賈不售兮阻德音其
幽幽述空文以繼志兮庶感通乎來古墓昔為之純英
兮又申申其以告予鼓弗躍兮麾弗前千五百年寥哉寂
焉謂天實為兮則吾豈敢惟審已兮乾乾

君子行

張載

君子防未然見幾天地先開物象未形弭災憂患前公
旦立無方不恤流言喧將聖見亂人天厭懲孤偏竊攘
豈予思瓜李安足論

上書行

劉攽

仕不至二千石賈不至五百萬此事夸者憂而非志士
歎君不見下邳少年受書起幄中運籌制千里功成不
受二萬戶拂衣歸從赤松子君不見計倪半策誅強吳
鷁夷扁舟浮五湖三致千金不自擅至今籍籍宗陶朱

大賢富貴不為己，心事邈與常人殊。逢時致身如反手，雲蒸龍變無時無。君勿愛上書獻賦，稱賢豪刺繡倚市相矜高。丈夫昔曾笑徒勞，商賈旦旦爭錐刀。

茂陵徐生歌

劉放

茂陵徐生老且迂，一心區區長信書。拜章北闕三待報，意欲霍氏安無虞。那知世主心不同，積惡未極難為功。徙薪曲突事不爾，壯戾幾人當受封。高岸為谷丘淵移，魯酒之薄耶鄆園。人生快已各以時，舊意望君君不思。

熙州行

劉攽

自胡請盟供貢職關西二紀剽兵革胡人歲來受金帛
地雖國本胡不惜帝家將軍勇無敵謀如轉圜心匪席
精誠動天天不隔鑿空借籌皆碩畫賈生屬國試五餌
買臣朔方發十策偏師倏然盡西海一月三捷猶餘力
百蠻解辮慕冠帶五郡掃地開城壁葱嶺陂陀蒲類深
回笑秦并與禹績尚書論功易等差御史行封自明白
武功勲爵十萬金徹侯印組丈二尺奮行過聖理自爾

少從進熟來無極憶昔漢武開西域天下騷然苦征役
哀痛輪臺置肥美割棄造陽損斗僻豈知洮河宜種稻
此去涼州皆白麥女桑被野水泉甘吳兒力耕秦婦織
行子雖為萬里程屋人坐盈九年食熙州歡娛軍事息
天王聖明丞相直

江南曲

沈括

新秋拂水無行跡夜夜隨潮過江北西風卷雨上半天
渡口微涼含晚碧城頭鼓響月脚垂天際籠煙鑠山色

高樓索莫臨長陌黃竹一聲無北客時平田苦少人耕
唯有蘆花滿江白

織婦怨

文同

擲梭兩肘倦踏繭雙足趼三日不住織一疋纔可剪織
處畏風日剪時審刀尺皆言邊幅好自愛經緯密昨朝
持入庫何事監官怒大字彫印文濃和油墨污父母抱
歸舍拋向中門下相看各無語淚迸若傾瀉質錢解衣
服買絲添上軸不敢輒下機連宵停火燭當須了租賦

豈暇恤襦袴前知寒切骨甘心肩骭露里胥踞門限叫
罵嗔納晚安得織婦心變作監官眼

自君之出矣

文同

自君之出矣弔影度晨夕中門一步地未省有行迹閨
闈足儀檢常恐犯繩尺欲寄錦字書知誰者云韵

五原行

文同

雲蕭蕭草搖落風吹黃沙昏寂寞山陰健兒臥寒日卓
旗繫馬人一匹夜來烽火連篝起銀鵲呼兵捷如鬼齊

集弓刀上隴行策馬揚鞭繞空壘羌人鈔暴為常事見
敵不爭收若雨自高聲勢敘邊功歲歲年年皆一同將
軍玩寇五原上朝廷不知但推賞

法惠寺橫翠閣

蘇軾

朝見吳山橫暮見吳山從吳山故多態轉側為君容幽
人起朱閣空洞更無物惟有千步岡東西作簾額春來
故國歸無期人言悲秋春更悲已泛平湖思濯錦更看
橫翠憶我眉雕闌能得幾時好不獨憑欄人易老百年

興衰更堪哀懸知草莽化池臺遊人尋我舊遊處但覓吳山橫處來

於潛僧綠筠軒

蘇軾

可使食無肉不可使居無竹無肉令人瘦無竹令人俗人瘦尚可肥俗士不可醫傍人笑此言似高還似癡若對此君仍大嚼世間那有揚州鶴

河復

蘇軾

熙寧十年秋河決澶淵注鉅野入淮泗自澶魏以北皆

絕流而齊楚大被其害彭門城下水二丈八尺七十餘
日不退吏民疲於守禦十月十三日澶州大風終日既
止而河流一枝已復故道聞之喜甚庶幾可塞乎乃作
河復詩歌之道路以致民怨而迎神休蓋守土者之志
也

君不見西漢元光元封間河決瓠子二十年鉅野東傾
淮泗滿楚人恣食黃河鱸萬里沙回封禪罷初遣越巫
沈白馬河公未許人力窮薪芻萬計隨流下吾君仁聖

如帝堯百神受職河神驕帝遣風師下約束北流夜起
澶州橋東風吹凍收微綠神功不用淇園竹楚人種麥
滿河淤仰看浮槎棲古木

禽言二首

蘇軾

南山昨夜雨西溪不可渡溪邊布穀兒勸我脫破袴不
辭脫袴溪水寒水中照見催租瘢

土人謂布穀為脫却破袴

姑惡姑惡姑不惡妾命薄君不見東海孝婦死作三年
乾不如廣漢龐姑去却還

姑惡水鳥也俗云婦以姑虐死故其聲云

書王定國所藏煙江疊嶂圖

蘇軾

江上愁心千疊山，浮空積翠如雲煙。
煙耶雲耶遠莫知，煙空雲散山依然。
但見兩崖蒼蒼暗絕谷，中有百道飛來泉。
縈林絡石隱復見，下赴谷口為奔川。
川平山開林麓斷，小橋野店依山前。
行人稍度喬木外，漁舟一葉江吞天。
使君何從得此本，點綴毫末分清妍。
不知人間何處有此境，徑欲往置二頃田。
君不見武昌樊口幽絕處，東坡先生留五年。
春風揺江天漠漠，暮雲卷雨山娟娟。

娟丹楓翻鷗伴水宿長松落雪驚晝眠桃花流水在人
世武陵豈必皆神仙江山清空我塵土雖有去路尋無
緣還君此畫三歎息山中故人應有招我歸來篇

書晁說之考牧圖後

蘇軾

我昔在田間但知羊與牛川平牛背穩如駕百斛舟舟
行無人岸自移我坐讀書牛不知前有百尾羊聽我鞭
聲如鼓輦我鞭不妄發視其後者而鞭之澤中草木長
草長病牛羊尋山跨坑谷騰趲筋骨強煙蓑雨笠長林

下老去而今空見畫世間馬耳射東風悔不長作多牛翁

鶴歎

蘇軾

園中有鶴馴可呼我欲呼之立坐隅鶴有難色側睨余
豈欲臆對如鵬乎我生如寄良羈孤三尺長頸閣瘦軀
俛啄少許便有餘何至以身為子娛驅之上堂立斯須
投以餅餌視若無憂然長鳴乃下趨難進易退我不如

荔枝歎

蘇軾

十里一置飛塵灰五里一堠兵火催填坑赴谷相枕藉
知是荔枝龍眼來飛車跨山鶻橫海風枝露葉如新採
宮中美人一破顏驚塵濺血留千載永元荔枝來交州
天寶歲貢取之涪至今欲食林甫肉無人舉觴酌伯游
我願天公怜赤子莫生尤物為瘡痍君不見武夷溪邊
粟粒芽前丁後蔡相寵加爭先取寵稱入貢今年闔品
充官茶吾君所乏豈在此致養口體何陋耶洛陽相君
忠孝家近時亦進姚黃花

東方書生行

蘇轍

東方書生多愚魯閉門讀書口生土
窓中白首抱遺經自信此書傳父祖
辟雍新說從上公策除僕射酬元功
太常弟子不知數日夜吟諷如寒蟲
四方窺覘不能得一卷百金猶復惜
康成穎達棄塵灰老聃瞿曇更出入
舊書句句傳先師中途欲棄還自疑
東隣小兒識機會半年外舍無不知
乘輕策肥正年少齒踈唇腐真堪笑
是非得失付它年眼前且買先騰蹕

和謝公定征南謠

黃庭堅

傳聞交州初陸梁東連五溪西氏羗軍行不斷蠻標盾
謀主皆收漢叛亡合浦譙門腥血沸晉興城下白骨荒
謀臣異時坐致寇守臣今日愧苞桑已遣戈舩下灘水
更分樓舩浮豫章頗聞師出三鵠路盡是中屯六郡良
漢南食麥如食玉湖南驅人如驅羊營平請穀三百萬
祁連引兵九千里少府私錢不敢知大農計歲今餘幾
土兵蕃馬貔虎同蝮蛇毒草篁竹中未論芻粟捐金費

直愁瘴癘連營空我思荊州李太守欲募蠻夷令自攻
至今民歌尹殺我州郡擇人誠見功張喬祝良不難得
誰借前箸開天聰詔書哀痛言語切為民一洗橫尸血
摧鋒陷堅賞萬戶塹山堙谷窮三冗南平舊時頗臣順
欲獻封疆請旄節廟謀猶計病中原豈知一朝更屠滅
天道從來不爭勝功臣好為可喜說交州鷄肋安足貪
漢開九郡勞臣監呂嘉不肯佩銀印徵側持戈敵百男
君不見往年瀕海未郡縣趙佗閉關罷朝獻老翁竊帝

聊自娛白頭抱孫思事漢孝文親遣勞苦書稽首請去
黃屋車得一亡十終不忍太宗之仁千古無

以團茶洮州綠石研贈無咎文潛 黃庭堅

晁子智囊可以括四海張子筆端可以回萬牛自我得
二士意氣傾九州道山延閣委竹帛清都太微聖冕旒
貝宮胎寒美明月天網下罩一日收此地要須無不有
紫皇訪問富春秋晁無咎贈君越侯所貢蒼玉璧可烹
玉塵試春色澆君胸中過秦論斟酌古今來活國張文

潛贈君洮州綠石含風漪能淬筆鋒利如錐請書元祐
開皇極第八思齊訪落詩

贈送張叔和

黃庭堅

張侯溫如鄒子律能令隱谷叅生春有齊先君之季女
十年擇對無可人箕帚掃公堂上塵家風孝友故相親
廟中時薦南澗蘋兒女衣袴得補紉兩家俱為白頭計
察公與人意甚真吏能束縛老姦手要使鰥寡無顰呻
但回此光還照已平生倦學皆日新我提養生之四印

君家所有更贈君百戰百勝不如一忍萬言萬當不如
一默無可簡擇眼界平不藏秋毫心地直我肱三折得
此醫自覺兩瞳生光輝團蒲日靜烏吟時鑪薰一炷試
觀之

平南謠

楊蟠

海南山似刀溪惡如發弩溪山毒煙中人骨水有蛟蜃
陸豺虎蠻人徭賊行若飛縱火劫民殺官府溪中之水
漲赤血山頭積屍變成土經年鬪戰兵已窮磔將屠城

不可數官家發軍救死國萬里歡喜得時雨誅擒凶黨
功德高海水一清奏歌舞山非無險水非無阻有地不
城城亦不武將民赤肉致戈戟口不能言心自苦

打麥

張舜民

打麥打麥彭彭魄魄聲在山南應山北五月太陽出東
北才離海嶠麥尚青轉到天心麥已熟鵲旦催人夜不
眠竹鷄呼雨雲如墨大婦腰鎌出小婦具筐逐上壠先
將青下壠已成束田家以苦乃為樂敢憚頭枯面焦黑

貴人薦廟已嘗新酒醴雍容會所親曲終厭飫勞僮僕
豈信田家未入唇盡將精好輸公賦次把斗升求市人
麥秋正急又秧禾豐歲自少凶歲多田家辛苦可奈何
將此打麥詞兼作插禾歌

勿去草

楊傑

勿去草草無惡若比世俗浮薄君不見長安公卿家
公卿盛時客如麻公卿去後門無車唯有芳草年年加
又不見千里萬里江湖濱觸目淒淒無故人唯有芳草

隨車輪一日還舊居門前草先除草於主人實無負主人於草宜何如勿去草草無惡若比世俗俗浮薄

妾薄命

陳師道

主家十二樓一身當千古來妾薄命事主不盡年起舞為主壽相送南陽阡忍着主衣裳為人作春妍有聲當徹天有淚當徹泉死者恐無知妾身長自憐

古墨行

陳師道

晁無數有李墨半丸云裕陵故物也往於秦少游家見

李墨不為文理質如金石亦裕陵所賜王平甫所藏者
潘谷見之再拜云真廷珪所作也世惟王四學士有之
與此為二矣嗟乎世不乏奇乏識者耳敬為長句率無
斲同作

秦郎百好俱第一墨丸如漆姿如石巧作松身與鏡面
借美於外非良質潘翁拜跪摩老眼一生再見三歎息
了知至鑒無遁形王家舊物秦家得君今所有亦其亞
伯仲小低猶子姪黃金白壁孰不有古錦囊句聊可敵

睿思殿裏春夜半燈火闌殘歌舞散自書細字答邊臣
萬里風塵入長筴初聞橋山送弓劒寧知玉盃人間見
夜光炎炎衝斗牛會有太史占星變人生尤物不必有
時一過目驚老醜念子何忍遽磨研少待須臾圖不朽
明窓靜几風日暖有愁萬斛才八斗徑須脫帽管城公
小試玉堂揮翰手

宋文鑑卷十三

欽定四庫全書薈要卷一萬九千九百三十七

集部

宋文鑑卷十四

宋 呂祖謙 編

詩 樂府歌行

勞歌

張耒

暑天三月元無雨雲頭不合惟飛土深堂無人午睡餘
欲動身先汗如雨忽憐長街負重民筋骸長轂十石弩
半衲遮背是生涯以力受金飽兒女人家牛馬繫高木
惟恐牛驅犯炎酷天工作民良久難誰知不如牛馬

福

江南曲

張耒

江蒲芽白江水綠江頭花開自幽淑人家晨炊欲熟時
旋去網魚惟所欲往來送租只用舩未省沙泥曾汙足
有錢買酒醉鄰畔終日數口常在目不學長安貴公卿
每遣離心寄朱轂朝游巖廊暮海島譴人未歸身自逐

牧牛兒

張耒

牧牛兒遠陂牧遠陂牧牛芳草綠兒怒掉鞭牛不觸澗

邊柳古南風清麥深蔽目田野平烏犍礪角逐草行老
犢臥噉饑不鳴犢兒跳梁沒草去隔林應母時一聲老
翁念兒自携餉出門先上崗頭望日斜風雨濕蓑衣拍
手唱歌尋伴歸遠村放牧風日薄近村牧牛泥水惡珠
璣燕趙兒不知兒生但知牛背樂

孫彥古畫風雨山水歌

張耒

山深巖高石壁青白日忽變天晦冥黑風驅雲走不停
驚電疾雨來如傾山前雨點大如手山下水湧危槎橫

崩崖古樹老有靈吼怒直與風雲爭枝披葉偃闢不怯
萬竅却欲藏雷霆鞭驢疾驅者誰子石路嶮澀驢凌兢
目迷心懾愈走愈不及來憩樹下如寒蠅蒼茫直與鬼
神接恍惚不保龍蛇驚平居此樂忽入眼孫家古圖才
可辨奈何一幅一尺餘欲奪天地之奇變我心愛之良
有以昔若山行親遇此一生兩足不下堂輸爾朱門貴
公子

于湖曲

張耒

蕪湖令寄示溫庭筠湖陰曲其序乃云晉王敦反屯于湖陰帝微行至其營敦夢日遠之覺而追不及故樂府有湖陰曲按晉地志有于湖而無湖陰本記云敦屯于湖又曰帝至于湖陰察營壘而去予頃遊蕪湖問父老湖陰所在皆莫知之也然則帝至于湖當為斷句乃作于湖曲以遺之使正其是非云

武昌雲旗蔽天赤夜築于湖洗鋒鏑巴滇綠駿風作蹄去如滅沒來不嘶日圍萬里纏孤壁虜氣如霜已潛釋

虵矛賤士識天顏
玉帳髯奴落妖魄
君不見銅駝陌上
塵沙起胡騎
春來飲瀍水
浮江天
馬是龍兒
蹙踏楊州
開帝里
王氣高懸
五百秋
弄兵老
淠空白
頭石城
戰骨
臥秋草
更欲君王
分上流

秋雨歎

許彥國

霖雨不出動隔旬
門前秋草長於人
江湖浩渺欲無岸
錦石最小猶生雲
微陽片月何曾見
只有莓苔昏筆硯
田家黍穗未暇悲
茅屋且為螢火飛

觀易元吉獐猿圖歌

秦觀

參天老木相樛枝，嵌空怪石銜青漪。兩猿上下，一旁掛
兩猿熟視蒼蛙疑，蕭蕭叢竹山風吹。海棠杜宇相因依，
下有兩獐從兩兒。花飡草鬻含春嬉，藝老筆精湖海書。
推意忘形，形更奇。解衣一掃，神扶持。他日自見猶嗟咨，
金錢百萬酒千鴟。荆南將軍欣得之，老禪豪取橐為垂。
白晝掩門初許窺，房櫳烟烟明冬曦。榛藂羽草分毫釐，
殘編未終且歸讀。歲暮有間重借披。

豆葉黃

晁補之

蒹葭蒼豆葉黃南村不見岡北村十頃強東家已滿箱
西家未上場豆葉黃野離離鼠窟之兔入畦豕母從豚兒
豕豚啼咿咿銜角復銜箕豆葉黃穀又熟翁媪衰鋪糜
粥豆葉黃葉黃不獨豆白黍堪作酒瓠大棗紅皺豆葉
黃穰穰何膻膻腰鎌獨健婦大男往何許官家散弓刀
要汝殺賊去

漁家傲

晁補之

渙家人言傲城市未曾到生理自江湖那知城市道晴
月七八船熙熙在清川但見笑相屬不省歌何曲忽然
四散歸遠處滄洲微或云後車載藏去無復在至老不
曲躬羊裘行澤中

蓮根有長絲

郭祥正

蓮根有長絲不供貧女織柳梢有飛綿不暖寒者衣朝
歌悠悠暮歌短下地沉沉上天遠東生白日還西流志
士長懷萬古愁

金山行

郭祥正

金山杳在滄溟中
雪崖冰柱浮仙宮
乾坤扶持自今古
日月髣髴躔西東
我泛靈槎出塵世
搜索異境窺神工
一朝登臨重太息
四時想像何其雄
卷簾夜閣掛北斗
大鯨駕浪吹長空
舟摧岸斷豈足數
往往霹靂鋤蛟龍
寒蟾八月蕩搖海
秋光上下磨青銅
鳥飛不盡暮天碧
漁歌忽斷蘆花風
蓬萊久聞未成往
壯觀絕致遙應同
潮生潮落夜還曉
物與數會誰能窮
百年形影浪自苦

便欲此地安微躬白雲南來入我望又起歸興隨征鴻

驪山歌

李 廌

君門如天深九重君王如帝坐法宮人生難處是安穩
何為來此驪山中複道連雲接金闕樓觀隱煙橫翠紅
林深谷暗迷八駿朝東暮西勞六龍六龍西幸峨眉棧悲風
便入華清院霓裳蕭散羽衣空麋鹿來遊墟市變我上
朝元春半老滿地落花人不掃羯鼓樓高掛夕陽長生
殿古生青草可憐吳楚兩醯鷄築臺未就已堪悲長楊

五柝漢幸免江都樓成隋自迷由來流連多喪德宴安
鴟毒因奢惑三風十愆古所戒不必驪山可亡國

築長堤

田 畫

築長堤白頭荷杵隨者妻背脅偃僂筋力微以手置胸
路旁啼老夫七十嫗與齊五尺應門生兩兒夜來春雨
深一犁破曉徑去耕南陂南隣里正豪且強白紙大字
來呼追科頭跣足不得藉要與官長修長堤官長亦大
賢能得使者意正堤駕輶軒不復問餘事終當升諸朝

自足富妻子何惜桑榆年一為官長死

叢臺歌

賀鑄

累土三百尺流光二千年人生物數不得待摧頽故址
秋風前武靈舊壠今安在禿樹無陰困樵采玉簫金鏡
未消沉幾見耕夫到城賣君不聞叢臺全盛時綺羅成
市遊春輝一從凋輦閉荒草蕭散行雲無復歸招魂想
像風流在晴華露蔓猶依稀縈紆棘逕撩人衣禾黍晚成
麋貉肥層簷壁瓦碎平地夢作鴛鴦相伴飛登臨弔古

將語誰城郭人民今是非指君看取故時物南有清流
西翠微彷徨華表不忍去豈獨遼東丁令威

五言古詩

誠兒姪八百字

范質

昨得謝課書希於京秩之中更與遷轉余以諸兒姪輩
生長以來未諳外事艱難損益懵然莫辨因抒古詩一
章曉之

去年初釋褐一命列蓬丘

謂謝課

青袍春草色白紵棄如

仇適會龍飛慶王澤天下流爾得六品階無乃太為優
凡登進士第四選昇校讐歷官十五考敘階與爾儔如
何志未滿意欲陵雲遊若言品位卑寄書來我求省之
再三歎不覺淚盈眸吾家本寒素門地寡公侯先子有
令德樂道尚優游生逢世多僻委順信沉浮仕官不喜
違吏隱同莊周積善有餘慶清白為貽謀伊余奉家訓
孜孜務進修夙夜事勤肅言行思悔尤出門擇交友防
慎畏薰蕕省躬常懼玷恐掇庭闈羞童年志于學不墮

為箕裘二十中甲科賴尾化為虬

二十三進士及第今舉全數

三十

入翰苑

時三十三

步武向瀛洲四十登宰輔

年四十一

貂冠侍冕

疏備位行一紀將何助帝猷既非救旱雨豈是濟川舟
天子未遐棄日益素飡憂黃河潤九里草木皆寢漬吾
宗凡九人繼踵昇官次門內無白丁森森朱綠紫鸛行
洎內職亞尹州從事府掾監省官高低皆清美悉由僥
倖昇不因資考至朝廷懸爵秩命之曰公器才者祿及
身功者賞於世非才及非功安得專厚利寒衣內府帛

飢食太倉米不蚕復不穡未嘗勤四體雖然一家榮豈

塞衆人議顒顒十目窺齷齪千人指

曾參云十目所視
古人云千人所指

言可畏

借問你與吾如何不自媿戒爾學立身莫若先孝

悌怡怡奉親長不敢生驕易戰戰復兢兢造次必於是

戒爾學干祿莫若勤道藝常聞諸格言學而優則仕不

患人不知惟患學不至戒爾遠恥辱恭則近乎禮自卑

而尊人先彼而後已相鼠與茅鴟宜鑑詩人刺

毛詩相鼠刺無

禮左傳茅鴟刺不恭

戒爾勿放曠放曠非端士周孔垂名教齊梁

尚清議南朝稱八達千載穢青史戒爾勿嗜酒狂藥非
佳味能移謹厚性化為兇險類古今傾敗者歷歷皆可
記戒爾勿多言多言者衆忌苟不慎樞機災危從此始
是非毀譽間適足為身累舉世重交游擬結金蘭契忿
怨容易生風波當時起所以君子心汪汪淡如水舉世
好承奉昂昂增意氣不知承奉者以爾為翫戲所以古
人疾遽陳與戚施舉世重任俠史記輕死重義曰俠俗呼為氣義
為人赴急難往往陷刑死所以馬援書殷勤戒諸子

馬援

告兒孫書
甚非此事

舉世賤清素奉身好華侈肥馬衣輕裘揚揚
過閭里雖得市童怜還為識者鄙我本羈旅臣遭逢堯
舜理位重才不克戚戚懷憂畏深淵與薄冰蹈之惟恐
墜爾曹當憫我勿使增罪戾閉門斂蹤跡縮首避名勢
名勢不久居畢竟何足恃物盛必有衰有隆還有替速
成不堅牢亟走多顛躓灼灼園中花早發還先萎遲遲
澗畔松鬱鬱含晚翠賦命有疾徐青雲難力致寄語謝
諸郎躁進徒為耳

懷賢詩

王禹偁

僕直東觀時閱五代史見近朝名賢立功立事者聳慕
不已思欲形于詞詠而未遑今待罪上雒不與郡政專
以吟諷為事業因賦懷賢詩三首仍以官氏列于篇首
云

桑魏公

維翰

魏公王佐才獨力造晉室揮手廓氛霾放出扶桑日感
慨會風雲周旋居密勿下民得具瞻上帝賚良弼沉沉

帷幄謀落落政事筆品流遂甄別法令頗齊一跋勅朝
據案論兵夜造膝多士若鴛鴻官材咸有秩諸侯如狼
虎請謁盡股栗秉鈞多事朝綽綽有紀律遠將留侯比
近以贊皇匹志在混車書誓將闡儒術皇天未厭亂運
去何飈歟高祖厭寰區少帝無始卒老成既疏遠群小
相親暱瀆武兵漸驕倒懸人不恤和親絕強虜謀帥用
悍卒魏公在藩垣上䟽論得失七事若丹青辭切痛入
骨忠言殊不省直道果見屈鐵馬從北來煙塵晝蓬勃

穹廬易市朝左衽雜纓紱主辱臣不死囚縛自安逸唯
公獨遇害身殞名不沒惜乎英偉才濟世功未畢一讀
晉朝史遺恨空鬱鬱子孫亦不振天道難致詰

李兵部

濤

有唐張曲江盛名何曄曄請誅安祿山先覺不見納胡
雛有反相其事遠相接賢人何代無舊史聊可獵兵部
事晉朝文學中科甲強臣方跋扈朝士多恇怯獨持尚
方劔願斬犇鯨鬣堂堂張彥澤反勢凌閭闔拜章請顯

戮直氣不可壓三進叩玉墀植笏立冀英皇情彌慰撫
清問屢應答詹詹念小思曾不顧大業高吟歸去詩潺
湲淚承睫族種入封丘有同虞不臘張公領鐵馬朝市
黃塵合刺謁甚間詳辭氣殊不懾虎狼不敢害加禮為
下榻當年棄蹇諤異代居調燮相位席不暖帝澤安可
洽斯人既淪亡此風亦蕭颯滑稽何足累大節世已乏
安用學腐儒矻矻守禮法

王樞密

朴

西樞經緯才慷慨遇真主文學中甲科風雲參霸府直
躬在密勿未始畏強禦凭案讀古書箕踞視太祖澤欲
浸生民化將還邃古拆寺遇武宗排佛如韓愈盡髮群
莠芻使之藝禾黍兵威遂強盛人力不耗蠹世宗征淮
甸委任當留務馬前拜侯伯堦下列樵斧叱咤氣生風
將校汗如雨手築太平基胼胝不輟杵具瞻人有望衰
運時不與修短天難忱殲奪民何怙恩深與小斂撫桴
甚悲沮云亡復殄瘁前哲非虛語世豈乏賢良才難具

文武歷象過羲和文章敵燕許可能隨衆人冥冥歸塵
土子孫雖衆多必復事未覩誰銘遷客詩高揭王公墓
五哀詩

王禹偁

予讀杜工部八哀詩唯鄭廣文蘇司業名位僅不顯者
餘多將相大臣立功垂裕無所哀矣噫子美之詩蓋取
人之云亡邦國殄瘁而已非哀乎時也有未列於此者
待同志而嗣之云

故尚書兵部侍郎琅邪王公

祐

琅邪名父子少孤起徒步贅謁桑魏公藻鑑非易與撫
頂久歎惜王楊許為伍諸侯取為官佐幕大名府主帥
杜重武功大心跋扈天驥被繫維神龜罹網罟六師薄
孤壘三面開生路主人既釋放賓筵因註誤逼脅本非
辜貶謫尋不赴折腰紆墨綬塌翼久未舉梁竦恥州縣
長卿有辭賦裏行旌邑政柱史登朝序抨彈志不樂潤
色身有素錦窠應列宿星垣吟藥樹丹青生帝典金玉
鏗王度東觀秉直筆南宮司貢部時英萃門下謁謁騰

嘉譽鵬掀六月風豹蔚七日霧多才同列忌嫉惡姦人
怒排斥屢專城織羅仍典午名官頗流離衣食常貧窶
文明起代邸振拔非不遇紫微雖正拜白髮已遲暮史
魚直有遺張也剛不吐非才占清列志欲投兕虎英俊
在草萊力能生翅羽毀譽兩無私華袞閒蕭斧掌選循
故實尹京恥鈎距名位僅三事疾療嬰二豎告滿拜貳
卿君恩慰沉痾終見哲人萎蕭蕭空壠墓鯉庭有令嗣
鳳閣登仙署兩制列門生九原應自許蒼蒼猶足信吾

道似有數餘慶在子孫明明深可據

故尚書虞部員外郎知制誥貶萊州司馬渤海高

公錫

文自咸通後流散不復雅因仍歷五代秉筆多艷冶高
公在紫微濫觴誘學者自此遂彬彬不蕩亦不野惜哉
傷躁進忤旨出閣下吾君登大寶兌澤連霧灑均陽又
淮陽移徙曾不服遂無牽復命虛偶文明化何路得自
新賁志入長夜人謂賁太深終于郡司馬

故殿中侍御史滎陽鄭公起

柱史有名跡清才自天縱運思慶雲合落筆醴泉湧歌
詩與文賦錚錚人口諷揚袂入澤宮鵠心一箭中恃才
善戲謔負氣好侮弄大志有誰知細行乖自訟小諫事
世宗惕惕佩光寵太祖方歷試握兵權已重上書范魯
公先見不能用歷數不在周謳謠卒歸宋汗漫失屠龍
接輿遂謫鳳行荷伯倫鍾高臥畢卓瓮神德不為嫌優
待臺憲俸晚求萬泉令吏隱官資冗一旦隨朝露識者

彌哀痛無子副家聲身世若一夢文編多散失人口時
傳誦空持一器酒何處澆孤冢

故國子博士郭公

忠恕

汾陽飽經術賦性甚坦率在昔舉神童廣場推傑出尚

書誦在口何論落自筆

公應舉時口念尚書手寫論語

總角取科名弱

冠紆纓紱早佐襄陰幕漢鼎入周室矢志罷屠龍佯狂

遂捫虱周行亦俛俛吏隱多放逸滑稽東方朔圖畫王

摩詰古文識蝌蚪與學辨萍實字窮倉頡本篆證陽水

失王績醉為鄉伯倫居無匹俸錢之一囊宦路從三黜
朱衣多不著白髮仍慵櫛漸老羈旅年方見昇平日忽
以伎術召此意殊鬱鬱放口忤無鬚何門求造膝遁逃
終見捕譴逐道中卒遺孤落閭閻荒塚鳴蟋蟀手澤漸
難求誰家耀箱帙投吊焚此詩九原應有物

故太子中允知洛陽縣事潁公

贊

洛陽富文彩峭拔四子流提筆入廣場辭氣干斗牛擢
第在芸閣言事觸冕旒左降宰百里道勝心無憂才高

恥吏役放蕩不檢修起應賢良科下筆不見休青宮尚
淹恤赤縣且優游輕財糞土賤高義雲天浮懸罄任貧
窶盈樽長獻酬知己彼何人鳳閣與黿頭推挽終不起
壯志將焉收晚年圯橋役關市良可羞忽焉為異物寒
草封一丘孀嫠應凍餓交友誰尋求遺孫方稚齒爽秀
已邁邁皇天若有憑必使光貽謀

橄欖

王禹偁

江東多果實橄欖稱珍奇北人將就酒食之先顰眉皮

核苦且澁歷口復棄遺良久有回味始覺甘如飴我今
何所喻喻彼忠臣辭直道逆君耳斥退投天涯世亂思
其言噬臍焉能追寄語采詩者無輕橄欖詞

勸學篇

張詠

大化不自言委之在英才立門非有閉苦學當自開世
上百代名莫遣寒如灰晨鷄固自勉男子胡為哉胸中
一片地無使容纖埃海鷗尚可狎人世何嫌猜勤慎君
子職顏閔如瓊瑰刻薄小人事斯輩直可哀放蕩功不

遂滿盈身亦灾將心雖內疚禍福本無媒

悼蜀詩四十韻

張詠

至道紀號元祀春正月為審官院考績引對天子曰天
厭西蜀歲荐饑饉任失其人枉政殘剝民興惡作孽授
命虎旅殄滅兇逆矧彼黔首不聊其生觀人安民朕意
罔怠寬則育姦猛則殘俗得夫濟者實難其人爾惟方
直歷政有績叩焚幽遐往理其俗克畏克愛汝其欽哉
祇奉命乘輅西征夏四月二十有八日供厥職噫謀術

庸陋罔敢怠忽豪猾抑之賦斂乃息存恤窮困招綏流
亡杜厥剝削宣揚皇風間一歲而民弗克安非郡縣之
罪偏將之罪也有聽者孰不知民心上畏王師之剽掠
下畏草孽之強暴乎良家困弊漸復從賊庶賒其死深
可忿也天子遠九重孤賤者憚權豪而不敢言嗚呼雖
采詩之官闕之久矣然謠詠諷刺亦不可寂然詠敢作
悼蜀古詩四十韻書于視政之廳有識君子幸勿以狂
瞽為罪

蜀國富且庶風俗矜浮薄奢僭極珠貝狂佚務娛樂虹
橋吐飛泉煙柳閉朱閣燭影逐星沉歌聲和月落鬪鷄
破百萬呼盧縱犬噓遊女白玉璫驕馬黃金絡酒肆夜
不扃花市春慙昨禾稼暮雲連紈繡淑氣錯熙熙三十
年光景倏如昨天道本害盈侈極禍必作當時布政者
罔思救民瘼不能宣淳化移風復儉約情性非方直多
為聲色著從欲竊虛譽隨俗縱貪攫蠶食生靈機作威
恣暴虐佞罔天子聽所利唯剝削一方忿恨興千里攘

臂躍火氣烘寒空雪彩揮蓮萼無人能却敵何暇施擊
析害物黷貨輩皆為白刃爍瓦礫積臺榭荆棘迷城郭
里第鎖苔蕪庭軒喧燕雀斗粟金帛市東芻羅綺博悲
夫驕奢民不能飽葵藿朝廷僉元戎帥師蕩兇惡虎旅
一以至梟巢一何弱燎毛焰晶熒破作鋒熠燿兵驕不
可戢殺人如戲謔悼耄皆麗誅玉石何所度未能翦強
暴爭先謀剽掠良民生計空賒死心隕獲四野起豺狼
五畝孰耕鑿出師不以律餘孽何由却俾夫熾蜂蠆寡

術能籠絡邊陲未肅清胡顏食天爵世方尚奔競誰復
振蹇諤黃屋遠萬里九重高寒廓時稱多英雄才豈無
衛霍近聞命良臣拭目觀奇略

赴郡之初尋屬愆亢有司舉舊典取湫水徵巫覡
以致禱而涉旬靡應農事方急遣罷去越朔日
漸獲優洽

劉筠

優詔將州任視政纔旬時田畯訴炎暵坐虞多稼萎雲
將掉頭去波臣涸轍危行部殊未及隨車杳難期往慙

神父化

鮑德守南陽時多荒災唯此郡豐穰吏民愛悅號為神父

今取旱母咄

蕭推所莅

必赤地大旱人號為旱母

諸曹白事者雩典舉舊規郡北岐棘山上

有三湫池衙吏絜齊往汲水置縹瓷朝服領巫覡詰旦

迓諸岐承以結綵輿奉於五龍祠自是率賓介寅午款

于斯紛敷薦楮鏹浸漬灑楊枝瓦鑪松香鈍瓢樽黍酌

醺四壁繪神變正筵塑靈儀恠若葉公牖怪甚葛仙陂

老覡十數輩勃屑頭如魃童巫及伶倡貌寢語嘍囁但

多璫盜質曾乏婉孌姿交手操鈴拂合譟屢傲傲喧塵

著蓬髮穢汗落粉頤一聞且一嘔掩鼻以攢眉
隋蔚朝待族敗草震散之巽飄暮欲息竅竹呼復來
褻黷固已甚誕妄相馮隨如是者浹日僅得沾服滋嗟予政無狀
百拜胡敢辭矧夫民習俗姑用慰齋咨抑聞古人言天
幕入無私神道貴得一何乃託邪師遽俾送湫勺撤役
勤繭絲申明恤刑詔挺重捨輕疑從此四三日油霈洽
封圻又聞堯湯世水旱軫君慈存救自有術歛散適所
宜元元無菜色九載尚熙熙周禮地官職皇舞雖有祈

道經泣天下傷民誠弗為惟神稟聰正遠鬼務肅祇願
守有常德可戒興妖思

寄岳陽劉從事

韓 丕

秋來憶故人寓目臨大野遠近聞清商依稀奏幽雅經
霜樹半紅無風葉自下一片洞庭心聊憑塞鴻寫

溫泉詩

錢 易

悲哉天寶時帝耄政不修寵幸尊婦人陰極陽已柔外
戚盛本枝櫛比封列侯丞相大將軍備位甚悠悠天下

安旣久積漸力不周車服金玉煥黎庶饑寒愁驪山溫
泉宮晝幸與夜游一游百司備萬費一日輟誰能心自
快化作社稷憂國忠恣吞噬林甫懷姦偷安史據太原
鍾鼓無許收黃塵滿長安慘黷九廟羞天未使唐絕返
正如疾瘳自茲遊賞地荆棘生荒秋舊物悉已廢蜘蛛
挂重樓覽者咸寒心一過三迴頭因知帝王業堅固宣
鴻猷豈可信嗜欲侮美生瘡疣雕牆峻宇誠簡牘况有
由翻思泰離章續之應可仇

夏日山居詩

种放

陰陰林木靜寂寂無人境
紅綻紫葳香嵐沈玉膏冷看
雲時獨坐慎事常中省何客
馭風來新篁動踈影

諭蒙詩

种放

大盈卑百瀆自成浮天潯
崇邱下累塊竟為蔽日深王
者在謙小夙惟堯禹心拜言
尊賢仁慎德棄珠金自滿
九族散匪驕百善尋炳茲夏
商鑒滅國因夸淫



宋文鑑卷十四



總校官庶吉士

臣

張能照

校對官中書

臣

胡紹基

謄錄監生

臣

邱繹曾